

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma’n ZPM sawrkar hnuaiah mi taima leh mahni kea din tum ten Bana Kaih hnuaiah hlawkna tam tak an hmu tawh tih a sawi.
- 2. Excise and Narcotics Minister Pu Lalnghinglova Hmar chuan ZPM sawrkarah Excise Department in ruihhlo cheng vaibelchhe 71.64 man a hal ral tawh thu a sawi.
- 3. Lai Autonomous District Council ah ZPM leh MNF sawrkar intawm Lairam Legislature Party chu tunkar tawp emaw, karleh tirlam ah lakluh hman beisei a ni.
- 4. Prime Minister Narendra Modia chuan khawvel chhim lam ram Global South ten anmahnia dingchhuak turin kawng an zawh mek a ti.

<><><>

CM

Chief Minister Pu Lalduhoma’n ZPM sawrkar hnuaiah mi taima leh mahni kea din tum ten hlawkna tam tak an hmu tawh a ti a, dingchhuak duh te puihna tur Bana Kaih Loan dahkham ngai lo pek zel an ni tih a sawi.

Vawiin khan Serchhip Govt. College Campus-a College buatsaih 4th Winter Cum Cultural Fest a hmanpui na ah he thu hi a sawi a, Pu Lalduhoma chuan ZPM sawrkar hnuaiah sawrkar hna sang tel fair takin an la a ti a, thlai thar panga (5) ah support price pe in mi taima ten an dinchhuah pui mek tih sawiin Bana Kaih Loan hmangin dahkham ngailovin tanpuina an pe tih a sawi.

Pu Lalduhoma chuan Mizoram University chu kalpui thuai tum ani a ti a, Lunglei Mizoram Engineering College chu nakkumah Class tantir an tum tih sawiin zirna hmun changtlung tha neih bakah ram pum huapa zirlai tha chher chhuah kawngah zirna in hrang hrang te tan lak zual a ngaih thu sawiin zirlaite chu state chhung mai nilo ram pum huap thlira zirna kawngah theihtawpa tan lak zual a ngaih thu a sawi a ni.

<><><>

AGRICULTURE MINISTER

Agriculture and Farmers Welfare Minister Pu PC Vanlalruata’n a department chan Agriculture and Farmers Welfare department-in Digital Crop Survey kalpui tha lawmman pakhatna sorkar laipui atanga a dawng chu thawktute inpekna rah chhuah a ni, a ti.

Vawiin khan a pisa-ah chanchinbu mite lenga sawmin Agriculture Minister chuan, lawmman pakhatna chuan cheng vaibelchhe 50 a ken tel thu sawiin, India hmarchhak state tan bik cheng vaibelchhe 10 belh a ni a ti a, Mizoram chuan a vai a belhkhawmin cheng vaibelchhe 60 a dawg tih sawiin, Digital Crop Survey atana thil tul tamtak Land Mark Geo-referencing leh Land Mark Application siamchawp a ni chung a Mizoramin pakhatna dinhmun a la thei chu thawktute inpekna leh thawhrimna rah anih thu a sawi.

Pu PC Vanlalruata chuan Mizoramin a lawmman a dawn chu tehfung pathum zinga pakhat a nih thu sawiin tehfung dang pahnih cheng vaibelchhe 30 dawn theihna District tina khaw awmzat atanga 25% Digital Crop Survey kalpui leh cheng vaibelchhe 15 dawn theihna, District tina khaw awmzat atanga 50% atanga Digital Crop Survey-ah pawh lawmman pakhatna dawng leh ngei thei tura theitawpa hma an lak leh mek thu a sawi bawk.

<><><>

EXCISE MINISTER

Excise and Narcotics Minister Pu Lalnghinglova Hmar chuan ZPM sawrkarah Excise Department in ruihhlo cheng vaibelchhe 71.64 man a hal ral tawh thu a sawi.

He thu hi vawin khan a pisa a chanchinbu mite a kawmnaah sawiin, zu leh ruihhlo do kawnga chak lehzuala hmalak a nih theih nan district thar pathum - Saitual, Khawzawl leh Hnahthialah Excise and Narcotics Station hawn anih bakah heng station thar pathumte hi Assistant Commissioner pakhat theuhvin an uap vat theih tur thu a sawi a, Mizoram chhunga hmun hrang hranga ruihhlo dona atan lirthei 18 an lei thar bakah Mizoram sorkarin pathum dang a pek belh thu a sawi bawk.

Pu Lalnghinglova Hmar chuan Excise and Narcotics department-a thawktu indaih lohna phuhrukna atan direct recruitment hmanga thawktu 28 an lak bakah midang 39 lakna tur ruahmanna pawh a kal mek thu sawiin, Excise and Narcotics Department hna pawimawh tak, zu khapna dan siamthatna, “The Mizoram Liquor (Prohibition) Amendment Bill 2025” chu kumin March ni 10 khan Assembly thutkhawma pass-a nih thu leh March ni 19 ah Mizoram Gazette-a chhuah a nih thu a sawi a, he dan siamthat hnuaiah hian Grape mai bakah Mizoram a thlai leh thei rah thlanchhuahte hmanga local beer leh wine siam theih an nih dawn bakah a siamchhuah leh zawrhchhhuah dan pawh mumal leh tha zawk a kalpui tum a nih thu a sawi.

Excise and Narcotics Minister chuan Mizoram chhung district zawng zawngah zirlaite tan ruihhlo that lohzia inzirtirna tum 67 buatsaih ah mi 10,068 an tel a ti a, district hrang hrangah ruihhlo do beihpui chungchanga thutkhawmna hun chu a telpui thin thu sawiin hun hmasa lama Mizorama zu an man phai lama endik tura an thawn pawh chiang lehzuala endik leh a nih tur thute a sawi bawk.

<><><>

MPCC PRESS CONFERENCE

Mizoram Pradesh Congress Committee chuan nimina Lok Sabha thutkhawma Viksit Bharat Guarantee for Rozgar and Ajeevika Mission Bill pharh chu ni 100 inhlawhna a chhe zawng leh state ti phurrit zawnga kalpuina tur a nih thu a sawi.

Vawiina Aizawl Press club-a chanchinbu mite an kawmnaah, MPCC aiawh Pu TT Zothansanga chuan Lok Sabha thutkhawma rorel lai NDA bill put luh chu tuna Ni 100 inhlawhna MGNREGA kalphung, a chhe zawnga thlak danglam hlawkna a nih thu a sawi a, sorkar laipuiin Ni 100 inhlawhna-a a sum tum za a 90% chu India hmarchhak state leh Union Tettitory tih lovah chuan za a 60% chauh a nih tawh dawn bakah ni 100 ni thin chu ni 125 a tih nimahsela, an dan siamthar chuan ni 100 inhlawhna a mipuite’n an dikna chanvo neih pawh an humhim theih dawn tawh loh thu sawiin, kum 1924 a Mahatma Gandhi Congress President a lo nih tawh avang mai a MGNREGA tih VBG RAM G – ti a BJP in thlak an tum chu India hnam pa zahlohna a nih thu leh hun lo la awm tura BJP thang that duh vang a ti ni a an ngaih thu a sawi bawk.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

KOLASIB CRIME REPORT

Kolasib District chhung Police Station hrang hrangah kumin January atanga December 15 thleng khan thubuai ziahluh 157 a awm a, heng te hi Kolasib Police Station-ah thubuai 73, Vairengte PS-ah 48, Kawnpui PS-ah 16 leh Bairabi PS-ah 20 te a ni.

Thubuai ziah luh 157 zingah hian chinfel tawh 14 a awm a, thubuai la chinfel loh, chhui lai 37 awmin Thubuai chhuichhuah Court-a thehluh tawh 106 a awm bawk.

Kolasib District Police station tina thubuai ziah luh zingah mi In rawk tam berin thubuai 52 ziah luh a ni a, Court-a charge sheet thehluh 34 awm in, thubuai chinfel 5 leh la chinfel loh 13 a awm mek. Mi In rawk thubuai ziahluh hi Kolasib PS-ah tam berin case 32 ziahluh a ni a, heta tang hian case 3 chinfel a ni tawh a ni.

<><><>

LADC

Lai Autonomous District Council ah ZPM leh MNF chuan Lairam Legislature Party dinin, Sorkarna siam tumin hmalakna an kalpui mek a, tunkar tawp emaw, karleh tirlam ah chuan LADC ah Sorkar thar lakluh hman beisei a ni.

Lairam Legislature Party ah hian Member 14 awmin, LADC ah hian Sorkarna siamturin Member 13 tal neih a ngai a, LADC inthlanah MNF chuan Member ngah berin Seat 25 ah Seat 8 lain, Congress chuan Seat 7 lain, ZPM in Seat 6 an changa, BJP in seat 2 an lak bakah Independent candidate 2 an chak bawk a ni.

Inthlan Result hriat kim anih atangin LADC ah Sorkarna siam tumin Political Party te ah indawrna kalpui nghal niin, tunkar tir khan ZPM leh MNF ten Sorkar intawm siam turin thutlukna siam felin, Lairam Legislature Party dinin an hruaitu atan ZPM Member Vawmbuk bialtu MDC Pu T. Zakunga an thlang a, LADC ah Sorkar thar din turin bawhzui ngaite bawhzui nghal niin, Sorkar din tura thutawp siamtu tur Mizoram Governor chu tul pawimawh zuala a zinchhuah lai a nih vangin LADC ah Sorkar thar pian hun tur hriatlawk theih nilo mahse, tunkar tawp emaw, karleh tirlam ah chuan LADC ah Sorkar thar lakluh hman beisei a ni.

ZPM leh MNF ten inremsiamna an neihdan chuan CEM chu ZPM in an chang dawn a, MNF lamin Chairman leh Deputy CEM bak ah Executive Member 3 an chang tel bawk dawn a, tihian ZPM lam chuan Executive Member 5 an chang anga, Executive Member rank tho, hmunawl dang hnawhkhat tur chu CEM leh MNF Legislature Party ten ruahmanna an siam ang.

<><><>

PM

Prime Minister Narendra Modia chuan khawvel chhim lam ram Global South ten anmahnia dingchhuak turin kawng an zawh mek a ti. Vawiin khan PM Modia hian Ethiopia joint Parliament session ah he thu hi sawiin Global South ramte chuan mitin remin an dingchhuak mek a ti a. India leh Ethiopia chungchang sawiin an thawhdunna chuan an chhehvelah remna a siam a ti a. Mipui rorelna tundinin a awm a, mipui nitin nunah a bet tawh a ni a ti bawk. Prime Minister Modia chuan thusawiin India-Jordan inlaichinna chu a danglam bik tih sawiin hman ata tawh inrintawnna a awm thu leh eibar zawinna kawngah hmalam hun thui tak an thlir tih a sawi bawk a ni.

Prime Minister Modia hian vawiina Ethiopia a tlawh zawh hian Oman a pan leh nghal a ni.

<><><>

HOMEBOUND

Indian movie "Homebound" chu Academy Awards vawi 98-naah Best International Feature Film Category-ah award dawng thei tura thlan zingah a tel. He film hi Neeraj Ghaywan-a siam a ni a. Homebound hi he award dawng tura thlan hmasak film 15 zingah a tel a. Nakum 2026 March ni 15 ah Academy Award hi sem a ni ang..

<><><>